

WANTOK

Namba 147

Sarere, 4 Septemba, 1976

Prais 10t



OL I STAP WE?

Dia Edita - Mi laik autim liklik hap wari bilong mi. Mi save ritim o harim ol narapela kantri olsem Australia, Japan, Saina, Amerika, na ol arapela kantri tu ol i gat wan wan Hai Komisina bilong ol tasol yumi long Papua Niugini, yumi i gat wanpela Hai Komisina bilong yumi i stap o nogat?

Na mi save harim long re-



Mista Oala Oala Rarua



Mista Tom Critchley

OL I STAP ANTAP HIA

Dia Cornelius - Wantok Niuspepa i laik salim tok amamas bilong en long yu long dispela askim bilong yu long antap. Yes pren hia nau em bekim bilong em: Hai Komisina bilong yumi long Australia em Mista Oala Oa-

la Rarua, bilong Papua. Na Hai Komisina bilong Australia long PNG em Mista Tom Critchley. Yu ken lukim photo bilong tupela i stap antap. So pren: ating Wantok Niuspepa i stretim pinis liklik hap wari bilong yu.

Brian Eric Namiat,
Wantok/Wewak.

BIA EM AS TRU BILONG TRABEL

Dia Edita - Mi bin lukim planti man bilong PNG i poroman wantaim grinpela botol em bia botol. Taim bilong fotnait mi lukim ol i kisim mani pinis, ol i hariap tasol i go long hotel na poromanim grinpela botol i stap.

Bihain em i dring i go i go inap tru, orait, ol i kirap na wokabout i go long haus. Nau ol i stat long spak na ol i mekim ol kain kain tok nogut na raf nogut tru.

Taim ol i spak i stap na ol i lukim sampela yangpela

dio na tu mi i save ritim Wantok Niuspepa tu. Tasol mi no save ritim o harim o lukim tu wanpela piksa bilong PNG Hai Komisina. Mi save ritim na lukim piksa bilong ol lida na ol bikman bilong PNG. Tasol mi no save lukim piksa o ritim wanpela toktok bilong Hai Komisina bilong yumi. Na tu, mi no save Hai Komisina i kam long wanem provins tru. Em tasol wari bilong mi-

Corenilius K. Apakali,
Wanepap-Laiagam/Enga.

ting tu ol man i dring long en ol i save raun raun long nait na tromoi ston long ka na bagarapim haus na brukim stua na samting ol i lukim long ai bilong ol, ol i bagarapim tasol. Ol i no yusim tingting bilong ol long wanem, bia i paulim pinis.

Plis ol brata yusim tingting gut. Bipo ol tumbuna ol i no save dring bia, nogat tru. Ol i save kaikai kaukau, saksak, taro, yam. Ol i kaikai ol dispela samting pinis, ol i save dringim wara mambu.

Dispela pasin hia bilong dringim bia oltaim, oltaim, em i no pasin bilong PNG. Dring em i pasin bilong ol yuropien mi ting olsem: na yu olsem wanem?

Mi save harim sampela man i tok long ol arapela olsem. Ating yu meri na yu no laik long dring planti a? Ol i save tok subim moa yet i go i go na spoilim bodi bilong ol tu. Nau draipela bel i solap kranki tru.

Ol lapun man long ples ol i save tok olsem: yangpela man yu i gat bel? Ating yu laik karimpikinini samting? Nogat em bia ya em wara bilong ol waitman. Samting tru. Em tasol liklik wari bilong mi. Tenkyu olgeta wantok.

Peter Koyapu,
Erave/S.H.P.

HUSAT MAS BAIM KATEKIS

Dia Edita - Nau mi laik stretim wari bilong wantok ya, Asa Sege bilong Aitape, na ol arapela brata i save wari long mipela ol katekis long mani na kaikai na sindaun bilong mipela em i no gutpela tumas.

Yes em i tru. Ol wari bilong yupela mipela i lukim na olgeta manmeri tu i lukim pinis. Nau mi wanpela katekis bilong Aitape, Mi laik stretim ol tingting bilong yupela olgeta katolik i mas klia o save gut long ol wok bilong mipela ol katekis.

Mipela i no ol wokman bilong bisop o pater. Nogat

tru. No ken sutim tok o no givim belhevi long ol misinari. Nau mipela olgeta katekis i kamap wokman tru bilong yupela ol katolik pipel. Mipela i autim gutnius bilong Jisas Kraist na skul na lo bilong em i go long yupela olgeta pipel. I no go long ol misinari. Nogat. Em bilong mipela yet.

Nau yupela i lukim mipela ol katekis nau i kisim mani long han bilong ol pater. Mipela i save kisim K20 o K24 long wanpela mun. Na sindaun bilong mipela i no gutpela tumas. Olsem na yupela i wari. Yes mipela tu i wari. Nau husat tru bai i stretim ol dispela wari ya?

Bekim bilong dispela askim i go olsem. Yupela olgeta katolik pipel yet i mas stretim ol wari bilong mipela ol katekis bilong yupela. Bikos mipela i wokman bilong yupela nau. I no gat ol narapela man, em yupela tasol. Mipela i laikim olsem. Yupela i mas putim K20 o K30 moa antap long olupela pe bilong wanpela wanpela mun, na nau bai mipela inap long kisim K44 o K54 long ol fotnait.

Sapos yupela i mekim olsem, mi ting bai yupela i no gat moa wari bihain na mipela tu bai i no gat wari. Em bai yumi olgeta i kisim wankain sindaun na amamas wantaim.

Michael M. Bip,
Lumi/W.S.P.

LAIK BILONG WAN WAN, KAWAS

Dia Edita - Mi laik bekim pas bilong Francis Aluon bilong Arawa long Bougainville Provins, i kamap long WANTOK niuspepa long Sarere 12 Jun, 1976. Francis i bin tok ol man i bin pasim ples bilong ol meri long ol bikpela haus kaikai insait hia long Papua Niugini.

Yu save, insait long Papua Niugini, planti pipel i

Raitim pas na salim i go
long: WANTOK
BOX 396
WEWAK

laikim mani bilong helpim ol. Planti meri i pinisim fom 1, 2, 3, na ol i tok ol i gat bikpela save, na ol i laik kisim gutpela wok, na i no ol haus kaikai tasol.

Tarangu ol man hia i laik kisim mani em ol i laik kisim wok insait long ol bikpela haus kaikai insait long kantri bilong yumi PNG.

Em i laik bilong wan wan meri yet. Em i pinisim fom 1, 2, 3, na sapos em i laikim wok, orait, em i ken go aut long ol taun, na askim ol bikpela haus kaikai long kisim wok. Na sapos em i laik helpim papa na mama bilong em long ples, em i laik bilong em wanpela yet.

Mani i no save stap tasol long taun. Ples kanaka tu i gat mani. Kawas! Dispela toktok bilong yu, yu tok ol man i save pasim spes bilong ol meri, long ol bikpela haus kaikai insait long Papua Niugini i no tru.

Sapos dispela toktok bilong yu i kaikai, bai mi no inap kaikai. Bai mi tromoi i go stret long pipia dram.
Pauline Paura,
Manus Provins.

FAMILI PLENG EM I GUTPELA

Dia Edita - Mi laik bekim pas bilong brata hia MP Damien Kereku bilong Is Nu Briten Rijonal i kamap long Sarere 10 Julai long WANTOK namba 143. Mi no amamas tru long tok yu mekim long famili plening Yu tok em i bikpela rong long ai bilong God Papa.

I tru God i tok long Adam na Eva bai tupela i karim pikinini na pulimapim ples daunbilo. Long tingting bilong yu, yu ting ol pikinini bilong Adam na Eva husat? Yu na olgeta man long graun tasol?

Wanpela tingting yu bin kamapim tu yu tok bai em i densa bilong dispela kantri bilong yumi, sapos i no gat famili plening. Ating yu laikim moa na moa manmeri ha? Bai yumi slip insait long paip wara na klostu long rot olsem Afrika, na sampela ples, long olgeta laip bilong yumi.

Sori, yu memba bilong palamen na yu mas tingting i

go pas long problem bai PNG i kisim sapos yumi gat moa pipel o populesen hia.

Las tok mi laik tok olsem. Yu bin tok pil em i bilong kilim pikinini long bel. Dispela em i no tru. Wok bilong em long pasim o long stapim mama long karim pikinini, o long kisim bel, na i no bilong kilim bebi.

Sapos yu kristen man na i laik bihainim wanem samting God i bin tokim Adam na Eva long en, stap pastaim na yu tingting. Wanem gutpela ol samting bai mekim nesen bilong yumi i kamap strong na kristen kantri. Mi ting famili plening em i gutpela samting long Papua Niugini.

L. Kasmina na Warengle,
Sibilanga/W.S.P.

STIK I MAS TOK YET LONG PNG

Dia Edita - Mi wanpela bilong ol planti handet meri husat i save kisim kanda long taim oligo long skul.

Sapos yu askim mi; "yu laikim kanda?" Tru tumas, yu save pinis long wanem ansa o bekim bai mi givim yu. "Namba 1!" Long dispela yu ken save Alkan Tololo i mekim gutpela lo tru long stapim stik long ol skul.

Long mekim dispela naispela lo; lo bilong tambuim stik long skul, Alkan Tololo i orait long fridom bilong "Korapsen" long olgeta skulpikinini bilong mipela.

I wankain olsem Alkan Tololo i orait long ol skulpikinini ol i ken go pamuk nabaut, stil nabaut, pait, hamarim man, hamarim papa, krosim tisa, bikhet long ol tisa, na planti moa ol arapela kain kain pasin nogut.

Tude, ol skulpikinini i save bikhet moa, long wanem, ol i save stik i tambu. Narapela kain panismen i save helpim tumas ol skultisa. Planti tisa i wari long au bai ol i mekim ol bikhet manki i ken kamap gutpela.

Planti bilong mipela i bilip, stik tasol em i ken mekim ol pikinini i kamap gutpela. Em i mejik o sikret bilong edukesen. Mi bilip olsem planti man bipo i go long skul na tisa i save paitim ol na ol i strong na i no save ranawe long skul,

TU MINIT TINGTING

WITNES

Olgeta lain Kristen long Papua Niugini i toktok planti long witnes. Witnes em i man i sanap long kot na em inap long tok tru antap em i save long wanpela man, o em i bin lukim tru wanpela samting. Em i no ken giaman.

Witnes long tingting bilong ol Kristen em i wanpela manmeri inap long sanap long ai bilong ol arapela na soim em i Kristen. Toktok bilong em, pasin bilong em, sindaun bilong em, eksampel bilong em - olgeta ol i soim man o meri ya i bihainim tok na skul bilong Jisas Kraiss.

Em i no haitim bilip bilong em. Nogat; em i autim - long pasin bilong em. Em i no olsem ol man i kamap klostu long wanpela hotel na ol i tok: orait nau lotu bilong mipela i stap ausait hia; taim mipela i go insait dring, mipela i no bilong wanpela lotu. Em i witnes bilong sem; em i trik, i giaman.

Na Kraiss i gat liklik tok long dispela samting stret, taim em i tok long Matyu 10:33 olsem: "Man i givim baksait long mi long ai bilong ol manmeri, mi tu bai mi givim baksait long dispela man long ai bilong Papa bilong mi long heven."

Na narapela man i tok: "Bipo mi Kristen. Nau mi bisnisman." O tru, a? Na i no gat wanpela samting ol i kolim Kristen bisnisman? Em i witnes. Na hamas man long gavman na politik i skin Kristen tasol? I no witnes. Mani na pawa i bin tanim het bilong ol; ol i antap nau; olgeta man i ken lukim ol.

Tru tumas, Kraiss i ken lukim ol na tok: "Man i autim nem bilong mi long ai bilong ol manmeri, mi tu bai autim nem bilong dispela man long ai bilong Papa bilong mi long heven." (Mat. 10:32.)

na ol i bin kamap gutpela la as tingting. Na long tru bihain i no gat bikhet. dispela tingting tasol ol i rausim simen mak long 1971,

Planti bilong ol i kamap gutpela lida tude. Michael Somare i wanpela bilong ol.

Husat i ting dispela tok bilong mi i kranki, em yet i save olsem em i giamanim em yet. Em i hap man bilong kopim o bihainim ol tasol.

Stik i mas tambu long ol Australia Skul tasol. Na i no mas long Papua Niugini, long wanem, Papua Niugini na Australia tupela wankain.

Rita Anggua,
Bogia/Madang.

KAGOMAN I RAIT

Dia Edita - Mi wanpela komiti memba bilong Seven Ašosiesen hia nau bai mi toktok liklik wantaim yu.

Yes, long yia 1970-71-72, ol i bin promis long dispe-

long Julai namba 7 de. Orait, em nau Papua Niugini Haus Asembli i bin kamap, na ol minista bilong gavman na Chif Minista na ol kebinet bilong Haus ov Asembli na konstitusen plening komiti tu i bin stat wantaim.

Na wanpela samting tu, em hia: Nupela mak bilong kantri, kumul i sindaun antap long kundu na spia. Na wan samting tu i bin kamap: Em Wantok Niuspepa bilong yumi

Na ol nupela sapta bilong Buk Baibel em i kamap long dispela as lo tasol. Na i no gat wanpela samting em i ken kamap nating long kantri. Kantri i ken kamap gut long trai hat bilong man na as tasol. Ol i kolim Histori. Tenkyu ol brata na pren.

Peter Nos Lapo,
Ulau/Aitape.

LUTERAN HAISKUL WIN

Lida bilong Oposisen, Sir Tei Abal, i bin singautim Praim Minista, Mista Michael Somare, long i go raun lukim Asaroka Lutheran Haiskul long namba 5 de bilong mun Septemba.

Asaroka Haiskul i bin holim wanpela open de o so bilong ol papamama.

Sir Abal yet i bin go raun na lukim pinis dispela Haiskul, na em i bin amamas nogut tru long lukim ol i kirapim projek bilong ol yet. Em i tok dispela skul i winim planti arapela long pasin bilong en. Ol i gat gaden kaikai bilong ol, na pik na kakaruk.

Long dispela tasol, Sir Abal i bin tokim 400 studen olsem, maski sapos ol i yusim ol hap stik o spet na wokim skin bilong ol doti, Papua Niugini i mas wok hat olsem wanpela independen kantri.

Na tu em i bin tok, olgeta wok bilong lidaship, na wok bilong developim dispela kantri i stap insait long han bilong ol studen. Tasol ol i no ken tromoim ol gutpela pasin bilong ol tum-buna.

OL TOLAI MERI

Bikpela grup tru bilong ol meri long Is Nu Briten, ol i kolim Nilai Ra Warden Asosiesen, i bin elektim Misis Sera Ainui olsem Namba tu Presiden bilong ol.

Misis Ainui bai i kisim ples bilong Misis Jessie Dabby, long wanem, Dabby bai i makim Nilai Ra Warden Asosiesen insait long Provinsal Gavman long Rabaul yet.

Moa long 80 meri i kamap long dispela miting na i baim fi bilong K5 long wanpela yia.

Nilai Ra Warden i bung wantaim ol sampela klap bilong ol Tolai meri.

GIAMAN LAISENS

Mejistret bilong Rabaul Distrik Kot, Mista Aphmedy Patterson, i bin kotim wanpela man i salim strongpela dring wantaim happepa, Warkurau Ni Gunan Kaunsil i bin givim long em.

Em i bin tok, ol pipel i mas kisim laisens bilong salim dring long Lika Laisensing Komisin. Ol i no ken wokim lo bilong ol yet, na kisim orait long ol arapela dipatmen a atoriti.

Long dispela tasol, Mista Patterson i bin tok, sapos man i brukim lo na salim bia long pablik, na i no gat laisens. Bai kot i mekim save long em longtaim ol i holim pas em, o painim em i salim bia nabaut long taun o ples.

OL TISA SPAK

Provinsal Edukesen Suparintenden long Lae, Mista Alan Isoaimo i bin tok ol-

sem, em i gat wari long wanem, ol tisa i no save mekim gut wok na ranim gut ol komyuniti skul long Siasasi na ol ailan i stap are-re long en.

Na tu em i bin tok, ol tisa i no save redim gut program bilong skul, na planti bilong ol i no save tingting liklik redim program. Nogat.

Mista Isoaimo yet i bin go mekim 9-pela de lukluk raun bilong em long 12-pela komyuniti skul. Namel long ol, Mandok Komyuniti Skul tasol i ran gut tru, na em gutpela eksampel bilong ol arapela skul long bihainim.

OL PROVINSAL OFISA BILONG IS NU BRITEN

Em hia nem bilong ol: Mista Joe Eko (Bainings); Mista John Golpak (Pomio); Mista Leonard Tarum (Duke of York Islands); Mista Lucas Tangilua (Gazelle), na Misis Jessie Dabby (Nilai Ra Warden Women's Association).

NU AILAN HAUS SIK

I no longtaim i go pinis, Pater Derrick Savage bilong Katolik Misin long Kavieng, i bin tok olsem, ol wokman i bin stat pinis long wokim gen Lemakot Katolik Helt Senta long Nu Ailan Provins.

Em i bin tok tu olsem, wok long helt senta ya bai i kostim samting olsem K120,000 olgeta. Bai i gat 8-pela nupela wod, rum bilong wasim klos, haus kuk, trening senta, na klinik bilong helpim ol pikinini.

Na tu em i bin tok, bai i gat 10-pela bet long wod bilong ol mama i karim pikinini, 30 bet long ol bikpela wod, na 9-pela bet long wod bilong ol manmeri i gat sik TB.

Ol lokal pipel i stap wok long Nu Ailan taun yet i bin givim K20,000. Na ol grup bilong Sios, Gavman ol Katolik long Jemani, i bin givim K136,000 olgeta.

TAMBU PILAI LAKI

Mista Kangedo Rapise, bilong Henganofi Kaunsil i tok: i gat planti trabel moa i kamap long Hailans, long wanem, Ol pipel i oltaim westim taim bilong ol long pilai laki tasol. Na dispela tasol i mekim ol komyuniti i gat bikpela wari moa.

National Dry-cell Batteries



BATERI em i samting yu ken karim i go long olgeta hap insait long redio o sutlam o teprikoda BATERI i kostim liklik mani tasol. NATIONAL BATERI i kam long faktori bilong ol saveman i wokim ol NATIONAL redio na kaset redio. NATIONAL BATERI i no save lik, na i save holim pawa longtaim. Yu traime. Yu baim long:

National

Distributors: **BURNS PHILP (New Guinea) LTD.**
Available at all Retail Stores.

Pablik Oda Bil kirapim planti tok kros

Long Mande, 23 Ogas, Prait Minista Michael Somare, i bin tekewe Pablik Oda Bil long palamen na olsem em i bin stapim bikpela tok pait i bin kamap namel long gavman long wanpela sait na Yunaitet Pati na Pablik Servis Asosiesen na ol Yunivesiti studen long arapela sait.

Pablik Oda Bil em i wanpela lain lo i givim spesel pawa long ol plisman long taim i gat bikpela trabel o pait o taim nogut i kamap long kantri.

Wanpela eksampel bilong dispela em i long taim ol i bagarapim Buin Haiskul long Bougainville na gavman i laik kolim bel bilong ol na i tambuim ol long kibung long dispela hap inap sampela wik. Bipo, long taim ol Mataungan i givim planti wari long gavman, em i laik wokim sampela lo tu bilong pasim ol Tolai.

Gavman i laik holim planti strong long han bilong em, bai em inap long pasim kwiktam rot bilong trabel

olsem long ol Hailans pait na kain samting olsem. Olsem na Mista Ebia Olewale, Minista bilong Jastis, i bin bringim wanpela mosen insait long palamen. Tasol ol i no vot long en yet; planti grup na man na lain i kirap nogut long harim dispela kain mosen. Sir Tei Abal em i paslain long ol.



PABLIK ODA BIL TOK

Dispela Pablik Oda Bil i laik givim dispela ol pawa long gavman bilong yusim inap long wan mun, sapos

sampela kain trabel i kamap:

(1) I mas gat tok orait bilong Minista bilong Jastis bipo ol man long wanpela hap tambu i ken mekim mas o mekim kibung.

(2) Sapos wanpela man i go sakim dispela lo na i mekim wanpela kibung long hap i tambu, em inap go long kalabus inap wan yia o baim kot long K500.

(3) Na olgeta wan wan man i stap insait long dispela kain kibung i tambu, em i ken kalabus inap 6 mun o ken baim kot long K200.

(4) Sapos wanpela man i kirap long wanpela kibung na i tok nogut, o skrapim bel bilong ol man bilong kirapim pait o trabel, bai em inap kot na kalabus.

(5) Na redio o niuspepa tu i ken kot sapos em i kirapim o skrapim bel bilong ol rida long pait o brukim lo o statim trabel o sanap birua bilong arapela lain man. Kain kot ya inap long K500 o wanpela yia kalabus.

(6) Sapos wanpela trabelman olsem i kot pinis, ol i ken tambuim em long kam insait long wanpela hap kantri.

(7) Plis bai gat pawa bilong stapim ka o balus na glasim gut ol samting insait long en, sapos ol i pilim draiva o pasindia i kam o i karim ol samting bilong statim trabel long wanpela hap.

KONSTITUSEN I TOK

Yunaitet Pati na ol arapela grup i egens long ol dispela tingting long wanem ol i tok ol dispela pasin i brukim na bagarapim sampela as tingting na lo bilong konstiusen. Long wanem em Konstitusen i tok:

(a) Plis i no ken pasim man nating o kam insait nating long haus bilong em.

(b) Mipela i fri long bihainim tingting na lotu bilong mipela.

(c) Mipela i ken autim tingting bilong mipela.

(i go moa long pes ?)

TOYOTA

WINIM OLGETA PMV LONG PNG



TOYOTA **ELA** MOTORS LIMITED

Burns Philp
GROUP OF COMPANIES


KALABUSMAN MAS HELPIM PLES

Mista Barry Holloway, em spika bilong palamen, i tok em i laik lukim ol kot i ken kisim pawa bilong mekim ol kalabusman i no go long kalabus, tasol ol i mas wok long helpim ples bilong ol.

Em i bin tok olsem long komisin bilong stretim lo i bin kibung long Goroka.

Mista Holloway i tok olsem, sapos wanpela man i kot na i kisim kalabus inap long tu mun, orait, em i mas go sindaun wantaim famili bilong em, tasol em i mas baim kot long wok bilong em olsem sapos wanpela kuskus i lusim kot, orait, olgeta wiken em i mas mekim wok kuskus bilong helpim lokal gavman bilong ples.

Olsem tasol gavman i ken sevim planti mani na em i no mas givim kaikai long ol kalabusman. Na tu ol inap mekim ol taun i klin na i go het long dispela wok,



Mista Barry Holloway


MOA BALUS MAS GO HAILANS

Memba bilong Nesenel Palamen, Mista Traiyma Kambipi, i bin askim Minista bilong Transpot, Mista Bruce Jephcott long salim olsem 2 o 3-pela balus bilong Air Niugini i go olsem long hap bilong Hailans.

Na tu em i bin tok, long olgeta de i save i gat planti pipel i wet long ples balus long kisim balus. Na tu long dispela tasol, em

wantaim 2-pela arapela Memba i bin kisim balus bilong karim kago na i go long miting long Port Moresby.

Long dispela, Mista Jephcott i bin tok, bai em i sekim gut sapos tok bilong Mista Kambipi i tru, o no-gat. Sapos em i tru, bai em inap long salim sampela moa balus i go long hap bilong Hailans.



Mista Traiyma Kambipi

HAISKUL GAT FAM

Long sampela taim i go pinis, Medlpa Eria Atoriti, i bin givim K1,000 olgeta long helpim Maun Hagen Haiskul i wokim bulmakau projek bilong ol yet.

Hetmasta bilong Maun Hagen Haiskul, Mista Arthur Hunt, i bin tok olsem, skul yet bai i kisim dinau mani inap K6,000 long Dvelopmen Beng. Mani ya i bilong baim banis na ol bulmakau.

Na tu em i bin tok, dispela projek i bilong helpim ol studen i lain moa long wok bilong bulmakau, na tu long helpim skul i wokim mani bilong en yet.

Bulmakau projek bai ol studen yet i wokim long Maun Ambra, i stap olsem 20 kilomita longwe long Maun Hagen. Graun ya i 50 hekta olgeta, na em i bilong Edukesen Dipatmen.

Skul i laik bai 100 bulmakau i stap long banis.

Buy the brand you can trust

maxell®



DISTRIBUTED IN PAPUA NEW GUINEA BY HAGEMEYER (AUSTRALASIA) B.V.

P.O. Box 673, Madang
Phone: 82 2445

P.O. Box 63, Rabaul
Phone: 92 2633

P.O. Box 1428, Boroko
Phone: 25 6144

P.O. Box 90, Lae
Phone: 42 3200



Medikal kaunsil bilong ol sios

Long Julai ol nes na dok-
ta bilong 14 misin i kibung
long Port Moresby long Me-
dikal Kaunsil bilong ol Sios.

Namba wan wari bilong ol
em spakpasin i bagarapim
PNG. Ol i tok "Operation
Moderation" i grisim ol man
long dring moa yet.

Ol misin i gat 1,166 helt
woka long PNG, na 471 nes.
Ol misin i 30% pesen bilong
olgeta wok helt, na 60% pe-
sen bilong ol komyuniti helt
nes, na 90% pesen bilong ol

rural nes trening. Olsem na
ol i mekim bikpela wok.

Tasol pe bilong ol i lik-
lik nating. Gavman i lusim
K30 milien kina long wan
wan yia long helt, na bilong
dispela ol misin i kisim
K1.8 milien tasol. Ol misin
i sevim helt dipatmen moa
olsem K15 milien kina long
wan wan yia.

INDEPENDENS HOLIDE

Praim Minista, Mista Mi-
chael Somare, i bin tok,
Papua Niugini bai i sele-
bretim nambawan holide bi-
long Independens stat long
Septemba 18 i go inap long
20.

Nesenel Eksekutiv Kaunsil
i bin vot olsem long olgeta
yia, Mande i kamap bihain
long Septemba 16, bai i pa-
blik holide bilong makim
PNG Independens. Olsem dis-
pela yia em Septemba 20.

I LUK OLSEM BISNIS BILONG LOKAL PIPEL I GO HET

Papua Niugini Dvelopmen Beng i bin givim dinau inap
long K7,200,000 long ol bisnis bilong ol lokal pipel in-
sait long yia i go pinis. Em i K2 milien kina moa olsem
long yia bipo.

Wok fama o wok bulmakau i win long kisim dinau. Em i
bin kisim K2,000,000.

Bipo wan wan lokal man i kisim dinau inap long K2,667
samting. Long dispela yia em i go inap K4,115 kina. Olsem
em i soim:ol lokal pipel i gat bisnis i moa bikpela nau.

Ol provins i win long kisim dinau em hia:Noten, Manus,
Enga, Westen, Simbu, Galp, Isten Hailans, Wes Sepik.

Dvelopmen Beng i gat 20 ofis bilong em insait long PNG.

Buy the brand you can trust



DISTRIBUTED IN PAPUA NEW GUINEA BY
HAGEMEYER (AUSTRALASIA) B.V.

maxell LN C90

Low Noise Cassette Tape

P.O. Box 673, Madang
Phone: 822445


P.O. Box 63, Rabaul
Phone: 922633

P.O. Box 1428, Boroko
Phone: 56144

P.O. Box 90, Lae
Phone: 423200

JVC MUSICAL PLEASURE


wanpela bilong yu stret




9437



9303E/R



9302E/R



9425

Olgeta samting yu laik painim insait
long wanpela kaset redio rikoda, em yu
ken painim long JVC.

Ol i no hevi, ol i isi long karim
nabaut. Na ol i gat gutpela lautspika
tru.

Yu go lukim long Hagemeyer bai yu inap
painim wanpela bilong laik bilong yu
stret. Na em bai stap planti yia moa.
Yu laik win, yu kisim JVC.

*9302E/R For people with get-up-and-go.
Rich, clear sound, automatic level control,
variable sound monitor, built-in
microphone, flexible 3-way power system.*

*9303E/R Sturdy radio cassette recorder
with best quality, solid state sound
reproduction. Automatic level control,
cue and review facilities. Mike mixing
with independent volume control.*

*9437 Eye catching 3 Band Radio Cassette
Recorder. Push button operation, built in
microphone, auto stop, tape counter,
tone control, variable monitor mixing.*

*9425 Advanced Radio Cassette Recorder
featuring 2 speakers, Powerful "5" woofer
2" tweeter cellular horn, input mixing,
auto stop, tape counter, built in
microphone, AC/DC operation,
auto head cleaner.*



DISTRIBUTED IN PAPUA NEW GUINEA BY
HAGEMEYER (AUSTRALASIA) B.V.

JVC

For further information write to:-

P.O. Box 673, Madang
Phone: 822445

P.O. Box 63, Rabaul
Phone: 922633

P.O. Box 1428, Boroko
Phone: 25 6144

P.O. Box 90, Lae
Phone: 423200

POTO GIVIM AIDIA



* Poto antap i soim wanpela smatpela man bilong PNG i gat wanpela fam bilong groim pis. Em wanpela bikpela hul wara tasol. Ol pis i save gro hariap moa long Sepik na long ol riva bilong Hailans. Ol i gutpela kaikai tru. Watpo yumi save baim planti tausen katon pis long ol ausait kantri? I gat hia.

* Poto daunbilo i soim tripela liklik meri bilong Australia i wokim ol plaua long pepa bilong hangamap na bilasim banis bilong wanpela stua long Adelaide. Ol stua bilong PNG i ken larim ol skulmanki i mekim olsem tu. Bai planti man kam insait.




* Ol saveman bilong bipo tru long Saina i bin tok: wanpela piksa em inap winim planti toktok.

Lukim gut ol piksa o poto long dispela pes; ol inap long givim nupela tingting o nupela aidia long yu.

Sapos yu yet yu gat kain poto olsem bilong ples o bilong wok bilong yu, yu salim i kam wantaim liklik skul na mipela inap prinim long WANTOK na bai mipela i raitim nem bilong yu aninit na yu ken amamas long ai bilong ol pren.

Tasol yu mas lukaut: ol i mas gutpela poto tru; ol i no ken tudak. Planti Polaroid poto i yogut tumas.



* Poto antap i soim wanpela pasin bilong wokabaut yumi no save yusim planti long PNG, em hos tasol. Yu no mas baim bensin bilong em; em i kaikai gras tasol. Na em inap kamapim nupela hos gen. Na tu em i save wokabaut long ples i no gat rot olgeta.



* Poto long lephan i soim man bilong Wes Sepik i bin wokim ol sia long kanda em i bin baim long ol pipel bilong bikbus. Olsem tasol ol i winim wan siling na man ya mekim gutpela bisnis.

Sia kanda i smat na strong na i bilong ol samting bilong bus tasol.



* Poto antap i soim paia long bus long Australia. Ol i bin painimaut nau planti hap bilong Australia i graun nating na i no gat tri o gras samting em i asua bilong ol tumbuna yet. Ol i bin laitim planti paia long bus bilong painim abus na ol i bagarapim kantri olgeta. Long PNG i ken kamap wankain tru long hap bilong Sepik na raun nabaut long Port Moresby.

* Long Australia sampela tausen haikul studen, olsem man yu lukim long poto daunbilo, i save lusim ol skulbuk bilong ol inap sampela mun na i go wok long kain kain woksap. Ol i mekim long laik bilong ol yet bilong kisim liklik save long planti kain wok. Long PNG planti haikul studen i no laik mekim doti han bilong ol long wok mekenik o wok kanda o wok fama samting.



Divelopmen beng helpim em

Mista Sam Poni bilong Port Moresby i hepi tru long san-ap klostu long bikpela trak bilong em. Em spesel kain trak bilong karim simen long ol ples we ol i wokim nupela haus o samting long simen. Trak ya inap karim 15 tan.

PNG Divelopmen Beng na Simen Kampani ol i kolim Ready Mix, tupela wantaim i helpim Mista Poni long statim bisnis bilong em. Em i trak bilong em stret; tasol em i mekim wok long karim ol simen bilong simen kampani; olsem na oltaim em i gat inap wok.



* Poto i soim Mista Masket Iangalio long lephan i sindaun wantaim Minista bilong Fainens, Mista Julius Chan, na dairekta bilong PNG Divelopmen Beng, Mista Alan Redman.

Eksekyutiv Kaunsil bilong Gavman i bin makim Mista Iangalio nupela dairekta bilong beng. Em i bin mekim dispela kain wok aninit long Mista Redman sampela yia nau na em i bin raun long Filipin Ailan na Indonesia na i lukim pasin bilong olkain divelopmen beng long dispela ol ples.

* Mista Iangalio i tok em i bin lainim planti samting moa long taim em i raun long ol liklik ples na sindaun toktok wantaim ol pipel na painimaut long ol, ol i gat wanem wari na olsem wanem divelopmen beng i ken helpim ol. Na tu em i painim, ol ofisa bilong beng i mas go long ol pipel na i no wet tasol inap ol pipel i kam long beng.

Bihain Mista Iangalio i bin raun olsem, na bihain em i bin mekim moa isi ol pasin bilong kisim dinau long beng, ol wok bilong PNG Divelopmen Beng i bin go het moa yet.

Mista Masket Iangalio em i bilong Yalis Viles klostu long Wapenamanda long Enga Provins. Em bin joinim wok bilong beng long 1970 na i bin winim Yunivesiti pinis tu.

KOPI I GIVIM WINMANI LONG OL MANMERI LONG HAILANS



na INVESMEN KOPORESEN FAN LONG PAPUA NIUGINI
i givim ol manmeri bilong Papua Niugini winmani tu!



KAM
INSAIT
LONG
DISPELA
BISNIS

Sapos yu laik save moa long pasin bilong winim mani olsem, yu rait i go long:
Investment Corporation
P.O. Box 155, Port Moresby

NEM:
ADRES:
.....

PABLIK ODA BIL TOK KROS

(i kam long pes 5)



TOKBEK BILONG SOMARE

Praim Minista Michael Somare, i bin mekim sampela strongpela tok long Sir Tei Abal na Pablik Sevis Asosiesen na ol Yunivesiti studen, long wanem ol i egens long dispela Pablik Oda Bil. Em i tok olsem:

(A) Dispela bil i no nupela samting. Haus Asembli long 1970 i votim orait long en na yumi bin yusim em inap nau. Na i no gat wanpela man i bin tok egens long en. Ating ol i no save long en. Nau tasol, ol i kirap nogut.

(B) Mista Somare i tok: Mi les pinis tru. Planti dispela ol man bilong Hailans yet, olsem Sir Tei, i oltaim oltaim strong long gavman i mas mekim strongpela lo na givim moa pawa long plis. Orait, nau mipela i laik bihainim laik bilong ol, na ol yet i kalap nogut. Neks taim i gat trabel, mi laik lukim Sir Tei na Yunaitet Pati na ol Pablik Sevis na ol studen i go stapim. Goan, mi laik lukim. Mi wet.

(C) Mipela i laik votim dispela Pablik Oda Bil bilong helpim gutpela sindaun bilong olgeta manmeri long PNG, bai yumi ken bel isi

450 sitisen

Sir Maori Kiki, Minista i bosim ol lo bilong larim ol manmeri i kamap sitisen, i tok long namba wan de bilong Septemba bai ol i givim setifiket bilong sitisen i go long 40 moa ausait pipel.

Inap nau i gat samting olsem 450 pipel i bin kamap PNG sitisen.

na ken mekim go het wok na bisnis bilong yumi.

Orait, neks taim i gat trabel long taun o ples o lain na ol plisman i no ken helpim yu

(d) Mipela i ken kibung long laik bilong mipela.

(e) Mipela i ken i go i kam long laik bilong mipela tu.

Gavman i pilim em i mas gat moa strong. Na ol arapela man i pret bai gavman i kisim tumas strong na i ken stat long krungutim ol pipel.

PROVINS

PRESEN

DINAU

PROVINS	PRESEN (K)	DINAU (K)
Sentral/Nesanel Kepital	141,415.80	141,880.20
Galp	43,205.70	22,222.00
Westen	61,398.00	89,656.00
Noten	214,958.00	325,516.00
Milne Be	73,245.00	39,531.00
Saten Hailans	248,686.00	145,043.90
Morobe	76,658.00	44,063.00
Madang	35,329.00	24,820.00
Is Sepik	208,938.00	301,263.00
Wes Sepik	136,511.00	216,946.70
Westen Hailans	41,310.00	26,696.00
Isten Hailans	72,700.00	68,000.00
Simbu	47,640.75	35,000.00
Enga	100,723.00	93,144.00
Is Nu Briten	25,508.00	40,000.00
Wes Nu Briten	14,035.00	12,742.00
Nu Ailan	45,700.00	61,000.00
Bougainville	55,000.00	60,000.00
Manus	11,570.00	14,000.00

KISIM SINGLIS FRI baim National No.1 Radio



RL-295U

Sapos yu baim wanpela NATIONAL PANASONIC redio (RL-195 o RL-295U) bai yu kisim fri wanpela singlis i gat mak na yu kamap smac moa.


National Panasonic
RL-195/RL-295U



"Hi-Top" batteries are made especially for all National Panasonic battery-powered products.



Burns Philp
(New Guinea) Ltd.



THE UNITED STATES OF AMERICA

Social Studies for Grade VI, broadcasts 15 September.

* The photo above shows American Negro scientist, Miss Delores Brown. She is one of 22,000,000 Negroes in the U.S.A. Every eleventh American is a Negro. Its capital city, Washington, is more than half Negro. Nowhere in the world do so many Negroes occupy such high and well paying positions in education, sports, government and business as in the United States.

There are also 18,000,000 Spanish speakers in the USA. These come mainly from South and Central America.


No country in the world accepts so many new citizens. Each day more than 1,000 new people arrive in the USA who will become citizens in the course of time.

* America has the biggest buildings in the world. Imagine the one pictured below: there is an entire football field under this roof, and 75,000 people watching the game.

* Americans are the only men who have walked on the moon. To date twelve of them have. They also invented the first atomic weapons as well as the airplane.

* Movies like this cowboy film usually come from U.S.A. America invented movies.

* Below is a picture showing wheat filling a truck. The USA raises more grain than any other country. Every year it exports more food than it eats.



Makim PNG long sios kaunsil



os long Graun, em ol i mekim long biktaun Geneva long kantri Swiserland.


Pasto Boesto i makim PNG long dispela bikpela kibung we ol deliget bai paitim toktok long sampela wari i kamap insait long ol kristen sios long planti kantri.

Wanpela wari em hia: yumi mas autim Gutnius bilong Kraus olsem wanem tude bai ol pipel i ken save gut insait bilong em na bihainim? Ol pipel i narakain nau na tingting bilong ol tu.

PASTO LESLIE BOSETO, hetman bilong Yunaitet Sios, em i bin go long bikpela kibung bilong Kaunsil Bilong Ol Si-

Las taim bikpela kibung i stap long Nairobi long kantri Kenya long Afrika.

Nupela bisop long Kerema




Port Moresby, tasol em i surik i givim ples long lokal man, Asbisop Herman ToPaivu.

Asbisop Copas i go liv long Australia long taim bilong Ista tasol em i no laik sevis long wok bilong God. Olsem na Pop Pol i bin tokim Bisop Louis Vangeke long katim hap bilong daiosis bilong em Bereina na givim long Asbisop Copas.

ASBISOP VIRGIL COPAS em i bosim nupela daiosis bilong Kerema. Bipo em i hetman bilong Katolik Sios long

Asbisop ya i bin kamap long PNG namba wan taim long 1945 na pastaim em i bin wok inap 6-pela yia long Rabaul. Bihain em i go wok long Milne Bay na long yia 1959 em i kisim wok olsem bisop bilong Port Moresby daiosis.

Tansania pater skulim yumi



planti save na ibosim semineri bilong ol inap 6 yia.

Em i bin kam long Nu Silan na Papua Niugini bilong glasim ol wok misin na givim sampela nupela aidia.


Em i bin mekim sampela kibung long Port Moresby na long Popondetta.

Em i amamas tru long kantri bilong em Tanzania na i lukim gutpela eksampel bilong Tansania long kirapim gut wok na pasin bilong ol.

(Post Courier poto)

PATER MARTIN MBWANA em i wanpela pris bilong Engliken Sios long kantri Tanzania long Afrika. Em i gat

Pasto Mbwana i tok ol wantok bilong em long ples ol i pilim strong tru dispela pasin bilong wok bung wantaim; olsem na ol i win.




- long 30t tasol -

CHRISTIAN BOOKSHOP
Box 169, Wewak



CHRISTIAN BOOKSHOP
Box 78, Mt. Hagen

Huset inap SALIM na FIKSIM em



- 4 strok ensin
- I gat 182 cc.
- Lektrik stata
- Rop stata tu
- Automatik olgeta
- Ken go stan tu.

Mipela i lukautim wanpela kampani i gat save inap long fiksim na salim dispela nupela 3 wil motobaik, Skoota-Kar. Em inap long karim kago na pasindia, i kostim liklik mani na i yusim liklik bensin. Em i gat lektrik stata tu. Sapos kampani bilong yu i gat laik long kisim dispela bisnis, yu rait i go long:

SKOOTA-KAR
Del Rey Motors Ltd.
Suite 54/55 Dina House
7 Duddell Street
Hong Kong



DOK HELPIM MAN

Longtaim tru wanpela lapun meri, wanpela boi na wanpela dok, ol i stap arere long maunten.

Dispela lapun, em man bi-

long em i dai pinis na em i no gat wanpela man. Dispela boi tu em papamama bilong em i dai pinis. Tupela i save stap long wanpela haus na wok wantaim.

Dispela dok i kamap long haus bilong tupela na tupela i save givim kaikai na lukautim em gut tru. Olgeta taim ol i save mekim gut long wanpela wanpela na wok wantaim long olgeta de.

Taim ol i laik wokim nupela gaden samting, ol i save stat long moningtaim tru na kam long haus long apinun tru. Ples ol i stap long en em i bus tru. I no gat gutpela ples bilong planim kaikai tru. Dispela ples i gat planti ston na bus tru. Sapos yu wokabaut long dispela hap bai yu lus olgeta.

Dispela dok ya em i klewa tru. Em i save wokabaut gut oltaim long rot.

Wanpela taim ol i go long gaden bilong ol long kamautim taro. Ol i wok long kamautim ol taro long moningtaim tru, samting olsem tu klok long apinun nau i stat long ren. Ol i bungim olgeta taro na ol i go long wanpela hap bilong sindaun, tasol ol i no painim wanpela haus tru.

Klostu taim ren i laik stat pundaun, ol i hait aninit long wanpela draipe-la ston i stap klostu long gaden. Em i olsem tudak tru. Ol i tok bai mipela i go long haus olsem wanem? Ol i wok long toktok i stap yet, na ol i ting mipela i lusim haus na i kam tasol husat bai i go long haus na lukim ol pik. Nau i tudak tru pinis ol i no lukim wanpela ples, nogat tru.

Dispela dok i tok olsem man na i tok; "Mi lukim haus na ol pik pinis." Nau yumi mas i go long haus. Yumi bai i go olsem wanem? Tupela i tok, na dok i bekim tok, lapun mama, holim tel bilong mi na tokim boi long holim han bilong yu. Nau dok i tok yumi go.

Tupela i wok long harim dok tasol. Tupela i pret tru. Klostu nau tupela i harim wanpela pik i krai. Olanan ol i kam pinis long haus bilong ol. Dispela ples em klostu long Kumdi insait long W.H.P.

Olsem na nau yumi save lukautim ol dok gut. Taim yumi lusim wanpela pik samting o narapela samting dok inap long smelim em na i painim kwiktaim tru. Em tasol.

Thomas Rambul,
Mt. Hagen.

maxell

LONG LIFE BATTERIES



**For all Transistors
Torches·Tape Recorders
& Record Players**

HAGEMEYER (AUSTRALASIA) B.V.

P.O. BOX 673, MADANG

Phone 82 2445

P.O. Box 63, RABAUL

Phone 92 2633

BOROKO P.O. BOX 1428

Phone 25 6144

P.O. BOX 90, LAE

Phone 42-3200

BONEA PIKSA

Heldsbach, Finschhafen

BONEA PIKSA EM I NAMBAWAN PLES LONG PAPUA NIUGINI LONG BAIM OLGETA KODAK FILM.

PE I STAP DAUNBILO TRU TRU.

NA TU LONG BONEA PIKSA MIPELA SAVE WASIM NA PRINIM PIKSA I KAMAP NAIS TRU.

INAP YU KISIM FRI FILM TU.

Sapos yu laik save moa long dispela wok, orait, yu salim pas i kam long:

BONEA PIKSA, HELDSBACH

P.O. BOX 217

FINSCHHAFEN



YU KEN YUSIM OL GUMI BILONG TAIA OLSEM

- (1) Yu ken pasim ol samting long baksait bilong motobaik o wilwil long hap gumi.
- (2) Sapos spring bilong ka o trak i bagarap yu ken pasim bilong nau wantaim hap gumi.
- (3) Sapos yu gluim tupela hap diwai samting, yu ken pasim tupela wantaim hap gumi, inap glu i drai pinis.
- (4) Pasim hap gumi long dua na em bai olsem wanpela spring i save pasim dua oltaim.
- (5) Sapos lok i stap ausait long dua, nilim hap gumi antap long en olsem liklik ruf.
- (6) Sapos ol meri wokim brum long nok bilong lip kokonas yu ken pasim na taitim wantaim hap gumi.
- (7) Sapos yu wokim haus, yu ken pasim ol liklik diwai long en long gumi sapos i no gat kanda.
- (8) Sapos mambu o paip i lik, pasim long hap gumi.
- (9) Hap gumi inap wok olsem smolpela hinsis long kes.
- (10) Gumi i gutpela long slingsot o katapel.
- (11) Sapos tep wara i lik, putim nupela gumi insait; yu ken wokim long olupela gumi bilong taia.
- (12) Gumi i gat win, em yu ken yusim bilong swimim olkain samting long wara.
- (13) Ol manki i ken swim wantaim gumi i gat win.

Long tok Inglis ol i save spelim dispela 6-pela tok wankain. Tasol ol i save tokautim ol 6-pela arakain arakain tru. Yu lukim na yu traim: plough, rough, cough, dough, through, hiccough. Man, tok Pisin i win long spel.

KUNDIAWA KAUNSI PINIS

Minista bilong Provinsal Afeas na Lokal Gavman, Mista Oscar Tammur, i bin pasim olgeta wok na tekewe olgeta pawa bilong Kundiawa Lokal Gavman Kaunsil long hap bilong Simbu Provins inap long sampela taim.

Kaunsil yet i bin askim Mista Tammur long pasim, long wanem, ol i gat wari long mani, na tu ol i no save yusim gut mani bilong takis long mekim wok bilong Kaunsil yet.

Long dispela tasol, bipo long Mista Tammur i bin pasim Kundiawa Kaunsil, sampela ol inspekta bilong Fainens Dipatmen i bin go raun na lukim na painimaut wanem kain wari ol kaunsila i gat long hap.

Olsem tasol na Kaunsil bai i no inap long mekim wanpela wok bilong en inap long wanpela mun samting. Tasol sapos Nesenel Eksekutiv Kaunsil na Gavana Jeneral i stretim gut olgeta tok, bai ol inap long statim gen wok bilong ol.

Bot ov Menesmen tu i laikim bai ol i makim 3-pela Gavman ofisa na 2-pela kaunsila hariap long lukautim wok bilong Kaunsil. Na tu Bot bai i lukluk long wanem kain wok na samting Kaunsil i gat laik long mekim.

Sampela hap bilong Baibel nau i bin kamap long 1577 tok ples olgeta.

Olpela na Nupela Testamen tupela wantaim i kamap pinis long 261 tok ples. Nupela Testamen, long 384 tok ples.

BAIM WANTOK

Sapos yu wanpela yu laik kisim WANTOK i kam long yu stret, orait yu salim dispela tiket i kam:


Mi laik kisim WANTOK, niuspepa inap wan yia olgeta. Nau mi salim K5 (\$5.00) i kam;

Nem:

Adres:

Salim i kam long:

WANTOK - P.O. BOX 396 - WEWAK



“Coke em i samting tru”



N.G.I. INDUSTRIES LAE, AUTHORISED BOTTLERS OF COCA-COLA AND FANTA.

KING FEATURES SYNDICATE



Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.